

दिनांक 09.09.2025
 समय: 18.45 बजे
 आकाशवाणी जयपुर-अजमेर
 प्रादेशिक समाचार

- उपराष्ट्रपति चुनाव सारू वोट पड्या-वोटां री गिणती सरू व्ही-आज ई नतीजा रो ऐलाणं
- राजस्थान विधि विरुद्ध धर्म संपरिवर्तन प्रतिषेध विधेयक 2025 विधानसभा मांय पास व्ह्यो -जबरदस्ती या धोखा ऊं कराया जावण वाळा धर्म परिवर्तन ने रोक्यो जा सकेलां
- वेटलैंड सिटी उदयपुर ने आर्द्र भूमि शहर मान्यता समारोह मांय राष्ट्रीय स्तर माथे ईनाम दे र नवाजी ज्यों
- राज्य मांय चौमासा री बिरखा कम पड़ी- तीन सप्ताह ताई घणखर हलकां मांय तेज बरसात रा आसार नी हैं

उपराष्ट्रपति चुनाव बाबत आज वोट पड्यां संवारे दस बज्यां सरू व्ह्यो वोट देवण रो काम सिज्यां पांच बज्यां ताई चाल्यो प्रधानमंत्री नरेन्द्र मोदी सब ऊं पैली संसद भवन परिसर मांय ई चुनाव सारू वोट दीनों वोटां री गिणती आज सिज्यां छह बज्यां सरू व्हे ग्यीं नतीजा रो ऐलाण आज ई कर्यो जावण रा आसार हैं उपराष्ट्रपति रो चुनाव संसद रा दोन्यू सदनां रा सदस्यां वाळो निर्वाचक मंडल करे हैं इण मांय गुप्त मतदान री प्रक्रिया काम ली जावे हैं मौजूदा दौर मांय लोकसभा मांय 542 अर राज्यसभा मांय 239 सदस्य हैं ई दफा उपराष्ट्रपति चुनाव मांय 391 वोट लेवण वाळो उम्मीदवार जीत हासिल करेलां चुनाव मांय एनडीए रा सी.पी. राधाकृष्णन अर इंडिया गठबंधन रा बी. सुदर्शन रेड्डी बीचे मुकाबलो हैं ई साल जुलाई महीना मांय स्वास्थ्य कारणां रो हवालो देता थकां वां बगत रा उपराष्ट्रपति जगदीप धनखड़ रे इस्तीफो देवण रे कारण ओ चुनाव करायो जा रह्यो हैं

.....

विधानसभा आज राजस्थान विधि विरुद्ध धर्म संपरिवर्तन प्रतिषेध विधेयक 2025 पास कर दीनों इण रो मकसद राज्य मांय जबरदस्ती या धोखा ऊं धर्म मांय बदलाव करावण ने रोकणो हैं ऐडी वारदातां रा दोषियां ने 7 ऊं 14 साल ताई री कैद अर 5 लाख रुपया ताई रा जुर्माना रो प्रावधान ई करी ज्यो हैं ई रा तैत किण ई संस्था या संगठन री ओर ऊं गैर-कानूनी तौर ऊं किण ई रा धर्म मांय बदलाव करावण परां संबंधित संस्था रा भवन ने जांच पाछे सील कर्यो जा सकेला या पाड्यो जा सकेलां ई बिल माथे चर्चा रे दौरान न्यारा-न्यारा दलां रा अर निर्दलीय सदस्य राय रखी, हालांकि कांग्रेस चर्चा मांय भाग नी लीनों खबरनवीसां सागे बातचीत करता थकां गृह राज्य मंत्री जवाहर सिंह बेढम कह्यो के हाल ही मांय धर्म मांय जबरदस्ती बदलाव रा केई वाकया सामी आया है, ज्यां ने ध्यान राखता थकां ओ बिल लायी ज्यो हैं

.....

आज सदन री कार्यवाही हंगामा रे कारण तीन दफा टाळणी पड़ीं प्रश्नकाल रे दौरान पख अर विपख रे बीचे ज़ोरदार बहस व्हीं सदन मांय विपख रा नेता टीकाराम जूली ने खानपुर हलका ऊं जुड़्या अपराधां रा बारा मांय पूरक सवाल पूछण री मंजूरी नी मिलण परा कांग्रेस रा विधायक खूब हंगामो कीनों

कांग्रेस रा सदस्य पंचायती राज अर स्थानीय निकायां रा चुनाव टेमसर नी करावण रे खिलाफ विधानसभा परिसर मांय प्रदर्शन कीनों

.....

नेपाल मांय सरकार रे खिलाफ कर्या जा रह्या प्रदर्शनां बीचे राजधानी काठमांडू रो हवाई अड्डो बंद कर दियो जावण रे कारण एयर इंडिया अर इंडिगो समेत केई हवाई कम्पनियां उड़ानां रद्द कर दीनी हैं एयर इंडिया रे मुजब मौजूदा हालात ने ध्यान राखता थकां दिल्ली-काठमांडू-दिल्ली उड़ान आज रद्द कर दीरीजीं इंडिगो री ओर ऊं जारी बयान रे मुजब काठमांडू आवण-जावण वाळी सगळी उड़ानां फिलहाल टाळ दीरीजी हैं अ हवाई कम्पनियां मुसाफिरां ने यात्रा ओजू तैय करण या टिकिट री रकम पाछी लेवण री राय दीनी हैं

.....

जीएसटी काउंसिल कानी ऊं लारला दिनां करी ज्या सुधारां रे पाण उद्योगां ने ई मज़बूती मिलेला अर माली व्यवस्था ने और बेहतर बणावण मांय आं सुधारां रो लम्बा बगत तांई असर पड़ेलां जीएसटी परिषद सीमेंट, स्टील, रेत, ईंट अर सिरेमिक सेनेटरी वेयर माथे टैक्स री रेट घटायी है जिण ऊं बनायी-चुणाई रो खर्च कम व्हेला, जिण रो सीधो फायदो ग्राहकां ने मिलेलां क्रेडाई राजस्थान रा महासचिव आशीष अग्रवाल बतायो के ई कटौती रो सीधो फायदो ग्राहकां ने मिलेलां

.....

ई फैसला ऊं खासतौर ऊं सस्ता अर मझला दर्जा रा मकान बणावण री परियोजनावां ने बधावो मिलेलां ई सागे ई प्रधानमंत्री नरेन्द्र मोदी री सगळां ने मकान मुहैया करावण री सोच ई पूरी व्हेवण मांय मदद मिलेलां

.....

प्रवासी राजस्थानी पुरस्कार 2025 सारू 12 सितम्बर तांई अर्जियां मांगी ज्यी हैं न्यारा-न्यारा हलकां मांय राजस्थान रो माथे ऊंचो करण वाळा प्रवासी राजस्थानियां ने ओ ईनाम दे र नवाजा जावेलां पहलो प्रवासी राजस्थानी दिवस दस दिसम्बर ने मनायो जावेलां

.....

केन्द्रीय पर्यावरण, वन अर जलवायु परिवर्तन मंत्री भूपेंद्र यादव आज नई दिल्ली मांय **स्वच्छ वायु सर्वेक्षण पुरस्कार** अर **आर्द्रभूमि शहर मान्यता समारोह 2025** रा तैत शहरां ने ईनाम दे र नवाजां राष्ट्रीय स्वच्छ वायु कार्यक्रम रा तैत हवा री गुणवत्ता रा मामला मांय इंदौर, जबलपुर, आगरा अर सूरत अगाड़ी रह्या, जदके इंदौर अर उदयपुर ने रामसर कन्वेंशन रा तैत अंतर्राष्ट्रीय मान्यता मिली हैं ई मौके श्री यादव 103 शहरां मांय हवा री गुणवत्ता मांय सुधार री चर्चा कीनीं केन्द्रीय मंत्री कह्यो के **वार्षिक स्वच्छ वायु सर्वेक्षण** अब वार्ड लेवल तांई कर्यो जावेलां वे री-साइकिल अर रियूज माथे ज़ोर देता थकां कह्यो के पर्यावरण ने बचावण सारू सर्कुलर इकोनॉमी अपनावणी व्हेलां

.....

राज्य मांय 19 सितम्बर ऊं गांव चलो अभियान चलायो जावेलां पंचायती राज मंत्री मदन दिलावर बतायो के 2 अक्टूबर तांई चालण वाळा ई अभियान रे दौरान दूर रा गांवाई हलकां तांई सरकारी योजनावां अर सेवावां रो फायदो पूगायो जावेलां वे कह्यो के ई अभियान रो मकसद गांवां ने खुद रे पाण ऊबा करणा, स्वच्छ, जागरूक अर मजबूत बणावणो हैं

.....

बाडमेर जिला मांय गडरारोड रा शहीद स्मारक माथे आज रेलवे शहीद मेळो भर्यों उत्तर पश्चिम रेलवे कर्मचारी यूनियन कानी ऊं लगायी ज्या शहीद मेळा मांय रेलवे रा शहीद व्ह्या बहादुर कर्मचारियां रा बलिदान ने सिरधाभाव सागे याद करी ज्यां ई मौके शहीदां रा पिरवार वाळा, जोधपुर मंडल रेल प्रबंधक, रेलवे रा अहलकार अर कर्मचारी मौजूद रह्यां ध्यान जोग है के साल 1965 मांय भारत-पाकिस्तान री लड़ाई रे दौरान गडरारोड अर गागरिया रेलवे टेशनां बीचे शहीद व्ह्या 17 रेल कर्मचारियां री याद मांय हर साल 9 सितंबर ने रेलवे शहीद मेळो भरे हैं

.....

राज्य मांय आज ऊं चौमासा री बिरखा रो जोर कम व्हेवण रा आसार है, हालांकि मौसम विभाग राज्य रा आतूणी हलका मांय चौमासा री बिरखा चालती रेहवण री संभावना जतायी हैं आज केवल जैसलमेर अर बाडमेर जिलां मांय बरसात सारू चेटायी ज्यो हैं राज्य मांय आवता तीन सप्ताह तांई घणखर हलकां मांय बिरखा रा आसार नी हैं मौसम केन्द्र जयपुर रा निदेशक, राधेश्याम शर्मा बतायो के ई दौरान प्रदेश रा ऊगणी हलका मांय कटे-कटे मेह बरस सके हैं

.....

प्रदेश मांय एक जून ऊं हाल तांई 23 जिलां मांय असामान्य, 17 मांय घणी बत्ती अर केवल जैसलमेर मांय सामान्य बारिश दर्ज करीजी हैं जल संसाधन विभाग ऊं मिली जाणकारी रे मुजब हाल तांई प्रदेश मांय 67 सेंटीमीटर बरसात व्हे गयी है, जद के सामान्य बारिश करीब 40 सेंटीमीटर हैं चोखी बिरखा रे कारण बंधा अर कूड़ा-बावडियां ई करीब 89 फीसदी भर ग्या हैं छोटा-मोटा 693 बंधा मांय ऊं 440 पूरा जद के 160 थोड़ा-घणा भर्या हैं

.....

17वीं एशिया कप क्रिकेट होड़ 2025 आज संयुक्त अरब अमीरात मांय शुरू व्हे रही हैं 28 सितम्बर तांई चालण वाळी ई होड़ रो उद्घाटन मुकाबलो अबू धाबी मांय अफ़ग़ानिस्तान अर हांगकांग बीचे मोड़ी सिंज्यां आठ बज्यां ऊं खेल्यो जावेलां होड़ मांय भारत रो पहलो मुकाबलो काल मेजबान संयुक्त अरब अमीरात री टीम ऊं व्हेलां 14 सितम्बर ने भारत अर पाकिस्तान बीचे मैच खेल्यो जावेलां पुरुषां रो ओ टूर्नामेंट ई दफा 20-20 ओवर रा मुकाबलां रो व्हेलां

.....